

Empresario local ta kere den e vision di rescate y proteccion di nos herencia historico y cultural

Serge Mansur: "Tur esnan cu por, tin un responsabilidad pa yuda"



E trabou di rescate y restauracion di 'Huisje Hart' cu ta e casita na skina pa'nord di Fort Zoutman, ta un realidad danki na e iniciativa di sector priva; un iniciativa cu Prome Minister Mike Eman ta aplaudi.

Diahuebs mainta, e mandatario a bishita e monumento caminda propietario Serge Mansur a dun'e un recorrido y splicacion di e trabounan haci. E empresario a confesa di a sinti su mes inspira pa e bon trabou cu Monumentenfonds y Bureau ta haciendo y cu no ta Gobierno so ta carga e responsabilidad pa salvaguardia e herencia historico y cultural di Aruba.

'Huisje Hart' te unda cu investigacion por a yega, ta e cas mas antiguo den Oranjestad. Pa hopi tempo e tabata bandona y den mal estado, pero afortunadamente el a wordo rescata pa futuro generacionnan por admira. Frecuentemente Minister President ta duna su restauracion como ehempel di empresarionan cu ta sigui ehempel di e vision pa haci di nos centro di ciudad, un atraccion turistico.

Sr. Mansur a haci un inversion

grandi y e propiedad ta casi cla pa su uzo comercial. Durante e proceso a pone atencion extra na, por ehempel, expone un parti di e construccion original, pa hende por ripara con esaki tabata. Tambe a pasa hopi tempo buscando e tegel di mas similar na esun autentico pa asina scapa un parti chikito di e historia y cultura di Aruba. Awe e propietario ta predica e satisfaccion indicando cu "Tur esnan cu por, tin un responsabilidad pa yuda y rescata e edificionan cu ta posibel."

Ye posibilidad t'ey paso tin hopi mas edificio den centro di ciudad cu por wordo restaura. Su mes tin otro proyecto na bista, cu ta bay cuminsa cu ne proximo aña. Tambe a menciona edificio di Mario's Sport Shop den Wilhelminastraat, conoci como Casa Rosada. Un inversionista di afo ta restaurando e cas y ta kedando masha bunita. Den Steenstraat tambe tin varios propiedad similar. "Hopi biaha, dor di nan estado, bo no ta wak nan bunitesa. Mi ta kere cu nos mester siña aprecia esaki,"

Mansur a bisa. E ta kere cu e edificionan aki tin hopi mas caracter cu un moderno. Tambe

nan ta mas acogedor, como tal hendenan tin mas inclinacion pa haci negoshi of sinta na un luga asina.

E papel di sector publico ta determinante den tur esaki. Admitiendo cu e trabounan a tarda mas di loke tabata kier, Mansur ta admiti cu e cambio a cuminsa y bo ta wak hopi di e trabounan cu a wordo haci durante ultimo aña. Deterioracion di nos centro di ciudad a tuma hopi aña y e ta kere cu pa nos drecha, ta bay tuma hopi aña y hopi inversion. Ambos sector tin

tareanan importantisimo.

"Obviamente doño di edificio tin un rol hopi importante y gobierno como esun cu ta crea e ambiente, e ley y regulacion cu ta rigi tur esaki, obviamente tambe tin un rol importante y e tin cu bay man den man; un no por bay un banda y e otro, otro banda. Esey a cuminsa drecha basta y mi ta spera cu e ta sigui asina," e empresario a duna di conoce. E ta ripara cu aparato gubernamental ta mas atento y flexibel pa duna sosten na e desaroyadonan di proyecto.